

**■ COLUMNA**

# Sport da naiv

DAD AITA DERMONT-STUPAN

**C**ur ch'i han badà che sin la naiv na glischnan be ils skis, ma er auters urdains, hani dà num al sport da skis sport da naiv, per al commercialisar. A mai ha quai adina parì in curius pled. Sco sch'il sport fiss fatg or da naiv u sco sch'ins faschess sport cun naiv.

**G**ia avant passa tschient onns avevani badà a San Murezzan ch'ins po sa divertir en u sin la naiv. Sche fin là era la naiv per nossa glieud plitost ina mulesta, signur Badrutt aveva vesì ch'ins po far in sport londerora. Da quel temp aveva quai anc num sport d'enviern.

**C**h'ins numnia sco ch'ins veglia, jau hai adina gi gugent la naiv, ed il sport. Jau ma regord da mattetta che jau cridava ina giada cur ch'i pluveva en ina bella naiv frestga a mez enviern. Gea, nus uffants ans avain divertids bler en la naiv, cun scarsolas, skis e cun ils patins sin il glatsch. Sche jau pens a nossa pista dadens il vitg, a mes emprimis skis, las patracas, sco quai che nus schevan. Ditg hai jau cartì che quai saja in pled per skis, patrac-



cas. Fin che jau hai emprais che patracca è in urdain che funcziuna miserabel. Ma las patracas na m'han betg prendì il plaschair dad ir cun skis.

**S**uenter è vegnì il lift sur il vitg, ed er il material in pau pli modern. Ma gia là eran las costas suleglivas sin 1500 m s. m. savens brinas e plaunet hani stuì serrar il lift.

**E**ntant era jau gronda avunda per ir cun auters uffants sin il territori da Motta Naluns, ed jau hai profità da mintga mument per esser da la partida.

**C**un mes uffants hai jau lura pudì emprendre ad enconuscher il Crap Sogn Gion, in dals gronds territoris da skis. Plaunet m'hai jau però er accurschida che quest sport n'ha per

mai betg bler da far pli cun naiv e skis, plitost cun circus.

**C**hapaivel, cur ch'ins ha gi in tschert temp adina puspè pistas adina pli gulivas, adina megliers skis, adina dapli skiunzs che van adina pli spert en crusch ed a travers, survegn ins er adina dapli avunda da quai. Ironia d'udir che tschertins giavischan als indigens da betg ir cun ils skis sur Naldal e Bumaun e pauc suenter vulan auters obligar ils indigens dad ir culs skis. Ils blers indigens èn unfis dad ir en ils territoris da skis. Ed ils esters vegnan er plaunet unfis, sco quai ch'ins vegn unfis da tut quai che vegn sugerì sco trend a la massa.

**M**a unfis u betg. Senza naiv na gidan tut ils sforzs per il sport da naiv nagut. Ed ins sto forsa laschar dar en il chau insatge auter. Er per mai èsi er pauc bel, ina fin d'emna da schaner, sco quella passada, cun plievgia fin passa 2000 meters. Ma forsa dat quai in pau da patratgar. A mai conforta il patratg ch'i dat almain (anc) insatge che l'uman na sa betg far: l'aura.

aita.ds-@kns.ch